

**REGIONAL NEWS BULLETIN**

**HEADLINES (MORNING)**

1. Chief Minister Pu Lalduhoman a kaihhruai sawrkarah tha taka hna kalpui an tum thu a sawi.
2. MPSC Chairman thar Pu R.Lalramnghaka chu nimin khan Governor Dr Hari Babu Kambhampati an rinawmna thu tiam tirin a lalut.
3. Lok sabha inthlan thawhngana atan nimin khan tuang taka vote thlak a ni.
4. Nimina Iran President Dr. Sayed Ebrahim Raisi leh Foreign Minister Hossein Amir-Abdollahian te chu India in vawiinah a sun dawn.

<><><>

**CM**

Chief Minister Pu Lalduhoman nimin khan a office-ah Mamit NGO Coordination Committee hruaitute a kawm a.

NGO Coordination Committee te hian Aizawl leh Mamit inkar kawngpui laih meka thil fel lo nia an hriat te, an rawtna te leh Highway atanga Mamit khawchhung luhna kawng tihzauh a tul thu te an thlen a, Mamit leh Bairabi inkar kawng zawn mek chu Mamit Town huam chung si, khaw sir deuhva kal tura zawn a ni a. Hei hi Mamit Bypass Road tha tak anih avangin tha an ti hle tih Chief Minister hi an hrilh bawk.

Chief Minister chuan, sawrkar in project monitoring committee chak tak a nei a. Mipuiten thil fel lo an hriatte thlen zung zung theihna tur Mipui Aw a nei bawk a. Tun hnuah chuan tuman hna an thawh chhiat duh a ring tawh lo, a ti a, a kaihhruai sawrkarah tha taka hna kalpui an tum thu a sawi bawk.

**(PR)**

<><><>

## SUPPLY DEPT

Food Civil Supplies & Consumer Affairs Minister Pu B.Lalchhanzovan nimitan a pisaah FCI Executive Director (North East) Pu DP Shukla leh a thawhpuite kawmin FCI lam hian Mizorama an hnathawh mek dan leh an mamawh tul te Minister hnenah hian an thlen.

An mamawh an thlen zingah hian Sairang Dintar Veng-a kudam (Buhfai quintal nuaih khat leng) an sak mek chungchanga Forest clearance avanga an buaina chuan kudam sak hna a tih thuanawp dan te an sawi a. Minister chuan LR&S hotuten he thil hi an buaipui sak mek thu leh Compensatory Afforestation atan ram an hmuh fel sak tawh thu a lo hrilh. Minister chuan Forest department lam hotute chu FCI ten kudam sak an chhonzawm theih nan an thlawpna a phut thu sawiin, buh leh bal a kan rin ber an nih avangin ngaihpaawimawh a tul zia a sawi bawk. EF&CC pawn theihtawp an chhuahpui tur thu a sawi. Pu B.Lalchhanzova chuan Khawzawl a FCI kudam (Quintal 33400 leng) sakna hmun a lei nghet tawk lo nia sawi chu endik thuai a, a rang lama hma la turin FCI houtute a chah.

Pu Sandeep Deora chuan Dintar veng, Sairang leh Khawzawl a kudam te sak zawh an nih chuan Mizoram ah FCI in vawikhata thla riat ei khawp chhek khawlina hmun anei thei dawn tih sawiin, hei hian fur pui leh khuarel chhياتna dang vanga rail leh kawngpuiah harsatna te thlen mahse Mizoram chuan buhfai ah security a neih dawn thu a sawi bawk. Pu B. Lalchhanzova chuan FCI hotute chu a tul anga kudam Mizoram hmun laili deuhah sak bellh dan tur ngaihtuah tura a tul thu sawiin, FCI hotutte chuan anlo bawhzui tur thu an hrilh ani.

(DIPR)

<><><>

## MPSC CHAIRMAN SWORN IN

Mizoram Public Service Commission (MPSC) Chairman thar Pu R.Lalramnghaka chu nimitan Khan Raj Bhawan Durbar Hall-ah Governor Dr Hari Babu Kambhampati an rinawmna thu tiam tirin a lalut.

MPSC Chairman laklulh Inkhawmah hian Chief Minister Pu Lalduhoma, Speaker Pu Lalbiakzama, Home Minister Pu K.Sapdanga, Cabinet Minister te, Minister te, MLA te leh mi pawimawh dangte an tel a, Pu Zoramthanga, Chief Minister hlui pawh a tel a ni.

Pu R.Lalramnghaka hi thiamna lamah B.Sc (Agri) degree a nei a. Kum 1991 khan Mizoram Civil Service a zawm a, chumi hnuah kum 2009 khan Indian Administrative Service (IAS), AGMUT Cadre-ah hlankai a ni leh bawk a ni.

Pu R. Lalramnghaka hian Mizoram sorkar hnuaiyah mawhphurhna pawimawh tak tak a chelh tawh thin a. MPSC Chairman atana ruat a nih hma chiah hian Secretary, General Administration Department & Public Works Department a ni a.

Pu.R.Lalramnghaka hi Sept ni 9 1965 ah a piang a. A nupui Pi Vanlalliani leh a fate nen Aizawl Electric vengah an cheng mek a ni.

(DIPR)

<><><>

## ASF

Kumin chhungin Vawk pul hri African Swine fever avangin Mizoramah vawk 835 an thi tawh ni a report a ni a, ASF vanga vawk suat tawh zat chu 1086 a tling a ni.

Animal Husbandry & Veterinary Dept in a chhinchhiah danin darkar 24 kalta chhung khan African Swine Fever (ASF) vanga vawk thi zat chu 9 a ni a, vawk suat zat chu 51 a ni a. Heng vawk thi te hi Thingsulthliah khuaah 5, Chhingchhip leh Khumtungah 2 ve ve a ni.

ASF vanga vawk thi zat hi Kum 2021-22 khan vawk thi zat chu 33417 a ni a, kum 2022-23 khan 12795 a ni a, kum 2023-24 chhungin 1139 niin tihian a vaiin ASF vanga vawk thi zat chu 47351 a ni tawh a. Vawk suat tawh zat hi Kum 2021-22 khan 12568, kum 2022-23 khan 11686, kum 2023-24 chhungin 980 niin tihian a vaiin vawk suat zat chu 25234 a ni tawh a. Vawk thi avanga tanpuina dawng chhungkua 2488 an awm tawh a. AH& Vety Dept chuan ASF vanga vawk chante tanpuina tur cheng nuai 311.66 an dil mek bawk.

(CORR)

<><><>

## PIGFED PRESS CONF

Mizoram Pig Farmer's Association chuan nimin khan Aizawl Press club ah thuthar lakhawmtute kawmin , Mizorama Frozen vawksa rawn lut chu dan phalloh ani a. A dan kawngah Mizoram Pig Farmer's Association chuan theihtawp a chhuah dawn tih an sawi.

Mizoram Pig Farmer's Association General Secretary Zorinpuia Chuan Mizoram ah 2021 April 16 ah ASF confirmed a ni a. Mizoram pum a run a, hemi avang hian Mizoram Pig Farmer's Association pawh ni 11 August 2021 ah a lo pian thu sawiin kum 2021 leh 2022 ah kum zawnin ASF hri in Mizoram pum min run a, hemi avang hian Vawk, vawk sa tanga eitur siam chhuah leh frozen vawksa state pawn leh ram dang atanga lak luh a khap a.

Amaherawhchu kum 2022 a hunpui vuakveta State pawn atanga lakluh phalna sorkarin a tih chhuah chu vil zuina a awm loh avangin ASF hri veilo annih leh nih loh pawh enfiah loh vawksa frozen te hi zalen takin sumdawng ten an la lut mek ani anti.

Frozen vawksa Metric ton tam tak a rawn lut mek a, hei hian vawk vulh tute an thar chhuah hralh kawngah harsatna a thlen mek tih sawiin Vety Department in a frozen vawksa lak luh atangin hlawkna an neilo nia an insawi chungin an hnuaia PIGFED in frozen vawksa an zuar hian vawksa frozen leh vawk a pum a talh tur lak luh thlengin zalenna kawng zau tak a hawng mek tih an sawi a.

Hemi chungchangah hian sorkarin hma la se an tih thu an sawi a ni.

(Corr)

<><><>

## MSDE

Ministry of Skill Development (MSDE) hnuaiah NSDC leh Skill India tangkawpin National Skill Competition - Indiaskills:2024 New Delhi-a a buatsaihah Mizoram Medal 8 a la a ni.

Labour, Employment, Skill Development and Entrepreneurship Department hmalaknain Mizoram chuan Indiaskills Competition : 2024 a tel turin trade 16 ah mi 16 a tir a ni.

Indiaskills 2024, National Competition-ah hian Competitor 1000 chuang State hrang hrang atanga State Winners theuhte kalkhawmin trade 61 hnuaiah intihsiakna an nei a, Mizo thalaite pawh skill trade 16 hnuaiah an tel thei a ni. He intihsiakna Gold leh Silver dawngte hian Worldskills : 2024, Lyon, France-a kumin September thla a neih turah India aiawhin intihsiakna an hmachhawn leh dawn a ni.

Mizoram Team-te hi LESDE Department Director, Pi Angela Zothanpuii hovin Official mi paruk ten an hruai a. Mizoram hi Indiaskills competition-ah a tum 2 telna niin kum 2022 khan Medal 2 Gold leh Bronze lo la tawhin, kumin hian Medal 8 an la leh thei a ni.

Mizoram Team te hi nimin khan Mizoram lo thlengin, Lawmna Inkhawm tawi Airport chawlbuk hmunah Department-in an lo buatsaih a, Officials leh participants Nu leh Pa ten he hun tawi hi an hmang ho thei a ni.

Labour, Employment, Skill Development & Entrepreneurship minister Pu Lalnghinglova Hmar chuan, India Skills Competition 2024 neih zawh taka Mizoram tana medal late chu an chhuanawm a tih thu a sawi.

LESDE Minster chuan social media kaltlanga lawmpuina thu sawiin, India Skills Competition 2024-ah Mizoram medal 4 leh Medallion of Excellence 4 lai a la thei chu lawmawm a tiin medal late a lawmpui a, a buaipuitu department pawh an chhuanawm, a ti.

(DIPR)

<><><>

## 5<sup>TH</sup> PHASE LS ELECTION

Lok sabha inthlan thawhngana atan nimin khan tuang taka vote thlak a ni a. A pumpuiah tlai dar 5 thlengin vote zaa 57 a tla.

. State paruk leh Union Territory pahniha Lok Sabha bial 49 ah vote thlak a ni a. Uttar Pradesh ah seat 14, Maharastra ah seat 13, West Bengal ah seat 7, Odisha leh Bihar ah seat 5 ve ve, Jharkhand ah seat 3 leh Jammu and Kashmir leh Ladakh ah seat 1 ve ve ah te inthlan buatsaih a ni a.

Candidate 699 awmin Candidate langsar zingah BJP leader leh Union Minister Rajnath Singh, Piyush Goyal, Smriti Irani, Congress leader Rahul Gandhi leh KL Sharma, National Conference leader Omar Abdullah leh LJP leader Chirag Paswan te an ni a.

Inthlana duty turin mi nuai 9 sing li leh sang 7 chuang tirhchhuah an ni a. Polling station sing 9 sang li leh 732 an awm a.

Lok Sabha inthlan rual hian Odisha Assembly bial 35 ah vote thlak a ni bawk.

(Newsonair)

<><><>

## INDIA MOURNED IRANIAN PRESIDENT DEAD

Nimina Iran President Dr. Sayed Ebrahim Raisi leh Foreign Minister Hossein Amir-Abdollahian te chu India in vawiinah a sun dawn a. Hemi chung hian

rampumah hnam puanzar a ngul chanvea zar tur ani a, sawrkar hminga intihhlamna chi reng reng huaihawt a ni lo ang.

Prime Minister Narendra Modia leh External Affairs Minister Dr.S. Jaishankar te chuan Dr. Raisi leh AMir Abdollahian te chu an ui thu an sawi a. Ram hruaitu pahnihten India leh Iran inlaichinnaa an thawhhlawk zia an tarlang a ni.

Puan tawh angina Iran President Ebrahim Raisi leh Foreign Minister Hossein Amir-Abdollahian te hi an ramchung hmar thlang lama helicopter chesualah an thi a. Iranian Red Crescent Society President sawidanin helicopter chesual hi nimin khan hmuh a ni a, damchhuak an awm lo a ni. Helicopter ah hian President leh Foreign Minister bakah hian sawrkar mi pawimawh dangte pawh an chuang a ni. President Raisi hi an ram thenawm Azerbaijan nen an inrinaa tuikhuah hawwna hun a hman zawhah a haw lam a ni a. Chhum zing nasa leh khaw chhia avanga helicopter hi chesual nia hriat a ni.

Iranian Cabinet chuan President leh Foreign Minister te an thi thu tihchian anih rualin inhmukhawm hmanhmawh a ko nghal a. Iran sawrkar danah chuan Supreme Leader Ayatollah Ali Khamenei-a pawmpuinain Vice President Mohammad Mokhber chuan President ai a awl lailawk dawn a. Ni 50 chhungin President thar thlan a ni ang.

(Newsonair)

<><><>